

ՎԵՐԱՊԱՏՐԱՍՏՈՂ ԿԱԶՄԱԿԵՐՊՈՒԹՅՈՒՆ  
«ՇԻՐԱԿԻ ՈՒՍՈՒՑԻՉՆԵՐԻ ՄԻՈՒԹՅՈՒՆ» ԳԿ ՀԿ

## ՀԵՏԱԶՈՏԱԿԱՆ ԱՇԽԱՏԱՆՔ

Ուսումնական հաստատություն՝ Լեռնուտի միջնակարգ դպրոց  
Մասնագիտություն՝ Պատմություն  
Թեմա՝ Պատմության կապը այլ գիտությունների հետ  
Կատարող՝ Մինասյան Լիլիթ Միքայելի  
Ղեկավար՝ Ալեքսանյան Կարինե

ԳՅՈՒՄՐԻ 2022

# ԲՈՎԱՆԴԱԿՈՒԹՅՈՒՆ

Ներածություն.....	3
<b>Գլուխ I</b>	
Պատմության կապը այլ գիտությունների հետ.....	4
1.1. Միջառարկայական կապերի ստեղծումը բնական և հումանիտար գիտությունների հետ.....	4
1.2. Հայոց պատմության կապը համաշխարհային պատմության հետ.....	7
<b>Գլուխ II</b>	
Միջառարկայական կապերի ստեղծման հնարավորությունները պատմության դասին.....	12
2.1. Միջառարկայական կապերի ստեղծումը բանավոր շարադրանքի ընթացքում ...	12
2.2. Ինտերակտիվ դասի պլան՝ ԽԻԿ համակարգով.....	14
Եզրակացություն.....	19
Օգտագործված գրականության ցանկ.....	21

## ՆԵՐԱԾՈՒԹՅՈՒՆ

Գիտության և արտադրության ինտեգրման ժամանակներում առաջնակարգ նշանակություն է ստանում գիտությունների համագործակցությունը՝ միջգիտական կապերը: Քանի որ ուսումնական առարկաներն ուսուցանում են գիտությունների հիմունքները, ուստի հրատապ է դառնում նաև ուսուցման գործընթացում միջառարկայական կապերի իրականացումը:

Ուսուցման արդյունավետությունը բարձրացնում են ոչ թե մեխանիկորեն սերտած տեղեկություններով, այլ իրականությունն արտացոլող միջառարկայական կապերով: Ուսուցման արդյունավետությունը բարձրացնելու համար անհրաժեշտ է ոչ թե ինտեգրում, այլ ուսումնական առարկաների ընթացակարգային կորդինացում միջառարկայական կապերի, որոնք արտացոլում են բնության և հասարակության մեջ առկա կապերը: Վերջին տասնամյակներում պատմության մեթոդիկայում մշակվել և կիրառվում են ուսուցման նոր մեթոդներ, որովհետև այդ են պահանջում մեր հասարակության զարգացման, վերակառուցման, գիտատեխնիկական առաջընթացի միտումները:

**Աշխատանքի նպատակն** է հիմնավորել միջառարկայական կապերի դերը ուսուցման մատչելիության, գիտելիքների որակի բարձրացման գործում: Ներկայացնել միջառարկայական կապերի հնարներն ու միջոցները պատմության դասավանդման ընթացքում, պարզել, թե որ գիտությունների հետ է կապված պատմությունը:

Ուսումնասիրության ընթացքում կիրառել ենք պատմահամեմատական, պատմավերլուծական և պատմաքննական մեթոդները:

**Թեմայի արդիականությունը:** Դասապրոցեսի ընթացքում ուսուցիչներն երբեմն սովորողներին մատուցում են նեղ առարկայական գիտելիքներ, որի արդյունքում դասը ստացվում է միատար, որոշ աշակերտների հետաքրքրությունը նվազում է: Սակայն, երբ կապում են դասն այլ առարկայի հետ դասի նկատմամբ բարձրանում է հետաքրքրությունը, խթանվում է աշակերտների տրամաբանությունը, վերլուծելու կարողությունը համակարգված և ընդլայնված մտածողությունը:

## ԳԼՈՒԽ I

### ՊԱՏՄՈՒԹՅԱՆ ԿԱՊԸ ԱՅԼ ԳԻՏՈՒԹՅՈՒՆՆԵՐԻ ՀԵՏ

#### 1.1. Միջառարկայական կապերի ստեղծումը բնական և հումանիտար գիտությունների հետ

Պետք է գիտակցել, որ քաղաքակրթության զարգացում, պատմական առաջընթաց տեղի չէր ունենա, եթե չլինեին հայտնագործություններ մաթեմատիկայի, երկրաչափության, ֆիզիկայի, քիմիայի, աստղագիտության, կենսաբանության, աշխարհագրության և այլ գիտությունների բնագավառներում: Պատմությունը դպրոցում դասավանդվող այն առարկան է, որը կարծես ի մի է բերում այդ բոլոր գիտությունների ձեռքբերումները, աշակերտների համար բացահայտում դրանց նշանակությունը: Պատմության շատ դասաժամեր ինտեգրված դասերի օրինակներ են, հատկապես գիտությանն և մշակույթին վերաբերող թեմաները:

**Ֆիզիկա** - Ներկայացնենք, թե ինչ կապ ունի պատմությունը ֆիզիկայի հետ: Օրինակ՝ երկրորդ համաշխարհային պատերազմի ավարտին ատոմային ռումբի կիրառումն ամերիկացիների կողմից, ռեակտիվ հրթիռների նշանակությունը Մեծ Հայրենականում և այլն: Այսինքն եթե բացատրվի, թե ինչ ազդեցություն ունեցան ատոմային ֆիզիկայի ձեռքբերումները Երկրորդ աշխարհամարտի ելքի վրա, ապա դա կնպաստի սովորողների կողմից ինքնուրույն վերլուծություններ կատարելուն և թեմայի հեշտ յուրացմանը:

**Կենսաբանություն** - Եթե ուսուցիչը ճիշտ ձևով ներկայացնի Չարլզ Դարվինի և Ֆլեմինգի պատմությունը, նա աշակերտների մեջ հետաքրքրություն կառաջացնի թե՛ կենսաբանության, թե՛ պատմության հանդեպ՝ ստիպելով այդ գիտությունները դիտել որպես մեկը մյուսին լրացնող գիտություններ:

**Բուսաբանություն** - Խոսելով որևէ ճակատամարտի մասին և նկարագրելով տեղանքը՝ ուսուցիչը միջառարկայական կապ է ստեղծում բուսաբանություն առարկայի հետ: Նա պետք է հիշեցնի, թե տեղանքում ինչպես ճիշտ կողմնորոշվել՝ բացատրելով, որ այդ գործում մեզ կօգնեն ծառերը, քանի որ նրանք հակված են իրենց ճյուղերն ուղղել դեպի հարավ, դեպի լույս, իսկ լույսը շատ է հարավում, որ մամուռները խոնավասեր են, խուսափում են արևի կիզիչ ճառագայթներից, լինում են հյուսիսային կողմում: Կամ, երբ խոսք է լինում թթվածնի մասին, որ օրվա մեջ

հսկայական չափով թթվածնի կորուստ է լինում և չի վերջանում: Մենք գիտենք, որ բույսերը կատարում են օդային սննդառություն այսինքն տերևների միջոցով օդից վերցնում են ածխաթթու գազը և արտադրում են թթվածին և այլն:

**Աշխարհագրություն** - Պատմությունն անմիջական կապ ունի նաև աշխարհագրության հետ, դրա մեջ է մտնում քարտեզի հետ աշխատանքը: Խոսելով որևէ ճակատամարտի մասին՝ քարտեզի վրա պետք է ցույց տրվի ճակատամարտի վայրը, զորքի շարժման ուղղությունը և այլն: Եթե խոսվում է Հայաստանում գոյություն ունեցող կառույցների մասին (Իջևան – Հրազդան երկաթուղին, Գորիս – Լաչին մայրուղին, Արփա – Սևան թունելը և այլն) կարելի է քարտեզի վրա ցույց տալ նրանց տեղադրությունը: Տնտեսական աշխարհագրությունից ուսումնասիրվում է պետական մոնոպոլիստական կապիտալիզմը, իսկ նորագույն պատմությունից՝ դարձյալ նույն հարցին անդրադառնում ենք «Ռուսաստանը 19-րդ դարի երկրորդ կեսին և 20-րդ դարի սկզբին» թեման ուսուցանելիս: Այստեղ երկու առարկաների ուսուցիչները պետք է համատեղ մեթոդական աշխատանք կատարեն այն պայմանով, որ աշխարհագրության դասին ուսուցիչը սովորողների ուշադրությունը կենտրոնացնի տնտեսական զարգացման օրինաչափությունների վրա, իսկ պատմության դասավանդման ժամանակ բացահայտվեն բանվորական և ազգային-ազատագրական շարժումները, պատերազմների էությունը, մշակույթի զարգացման հարցերը և այլն, իսկ տնտեսական հարցերի մասին տրվի համառոտ տեղեկություն:

**Գրականություն** - Պատմության դասընթացի ուսուցման ընթացքում կարելի է ստեղծել նաև լրացնող կապեր, որոնք օգտագործվում են տվյալ առարկաների հարակից առարկային վերաբերող հարցերը պարզաբանելու համար: Այդ տեսակետից բազմազան են պատմության և գրականության դասընթացների կապերն ու մեթոդները: Գեղարվեստական գրականության ընթերցանության հանձնարարումից մինչև գրողի ստեղծագործության հասարակական նշանակության բացահայտումը: Գեղարվեստական գրականության երկերից առանձին հատվածների օգտագործումը բարձրացնում է պատմության դասավանդման հուզականությունն ու դաստիարակչական ներգործությունը, դրանց զգալի մասը հանձնարարվում է իբրև արտադասարանական ընթերցանություն: Երբեմն հասարակական կյանքը լիարժեք կերպով է արտացոլվում գեղարվեստական գրականության մեջ:

Հայրենական Մեծ պատերազմի և հետպատերազմյան տարիների թեմաների վերաբերյալ կա հարուստ գեղարվեստական գրականություն, որից պատմության առարկայական նյութերին համապատասխան պետք է ընտրություն կատարել: Չէ որ Մեծ հայրենականի տարիներին ժողովուրդը դրսևորեց իր հերոսական նկարագիրը: Հայրենական Մեծ պատերազմի հերոսների կերպարներ կերտել են շատ գրողներ, որոնցից պետք է տեղին մեջբերումներ անել՝ ստեղծելով միջառարկայական կապեր: Օրինակ, Բորիս Պոլևոյն իր «Պատմվածք իսկական մարդու մասին» գրքում խոսել է տարբեր տարիքի և մասնագիտության տեր մարդկանց սխրանքների մասին, որոնք՝ սովորողներին ճանաչողական և դաստիարակչական առատ նյութ կտան:

Կ. Մարքսը և Ֆ. Էնգելսը նշել են, որ գեղարվեստական գրականության ճանաչողական նյութերը հաճախ շատ ավելի խոր և բազմակողմանի են եղել, քան բուրժուական հասարակական գիտության տվյալները: Կ.Մարքսը 19-րդ դարակեսի անգլիական ռեալիստական վիպասանների մասին գրել է. «Անգլիայի վիպագիրների ժամանակակից փայլուն դպրոցի ցայտուն ու պերճախոս նկարագրությունները աշխարհի առջև բացահայտեցին ավելի շատ քաղաքական ու սոցիալական ճշմարտություններ, քան այդ արեցին քաղաքագետները, հրապարակախոսները և բարոյագետները միասին վերցրած»:

Հայ հեղինակներից Մուրացանը, Բաֆֆին և ուրիշներ անցյալի հերոսների միջոցով փորձել են ներկայացնել իրենց ժամանակի իրականության պատկերը: Իրենց ստեղծագործություններում անցյալի պատմական հերոսներին հարություն տալը այն նպատակին է ծառայում, որպեսզի փառաբանեն նոր պայքարները:

**Հոգեբանություն** - Պատմության դասավանդման մեթոդիկական սերտ կապերի մեջ է հոգեբանության հետ, քանի որ այդ առարկայի իմացությունն օգնում է ուսուցչին՝ ճիշտ հասկանալու սովորողների զարգացման օրինաչափությունները, տարիքային առանձնահատկությունները: Հոգեբանությունը բացահայտում է այնպիսի կարևոր նշանակություն ունեցող խնդիրներ, ինչպիսիք են՝ դպրոցականների ըմբռնումները, մտապատկերների ստեղծումն ու հիշողության, երևակայության, մտածողության, խոսքի զարգացումը: Հոգեբանությունն ուսուցչի ուշադրությունը կենտրոնացնում է աշակերտի, անձի ընդունակությունների վրա և ուսուցչին տալիս է մի շարք

անհրաժեշտ խորհուրդներ՝ դիտարկումներ կատարելու պատմական նյութի խոր յուրացման համար:

**Արվեստ** - Բնագիտական և հումանիտար առարկաների տեսական վերլուծություններին օգնում են կերպարվեստից ստացած գիտելիքները: Արվեստով և տեխնոլոգիայով պետք է զբաղվել ոչ միայն նկարչություն ընտրած սովորողներին: Դա զարգացնում է ճաշակ, գեղեցիկը նկատելը, գրագետ և գեղեցիկ հարաբերվելը և այլն: Արվեստով զբաղվելու նպատակը, գեղեցիկ և ճիշտ նկարելը չէ, այլ գեղագիտորեն դաստիարակված անհատ լինելն է: Պարապմունքը առավել հետաքրքրիչ է և արդյունավետ, երբ մի առարկան համագործակցում է մյուսի հետ: Ահա մի քանի նախագծեր, որը իրականացվել է հիմք ընդունելով միջառարկայան կապերի գաղափարները:

## 1.2. Հայոց պատմության կապը համաշխարհային պատմության հետ

Պատմության դասավանդման ժամանակ միջառարկայական կապեր կարելի է ստեղծել գրեթե բոլոր առարկաների հետ՝ մասնավորապես համաշխարհային պատմության հետ, քանի որ հայոց պատմությունը կազմում է համաշխարհային պատմության մի օղակը: Ուստի այն պետք է ուսումնասիրվի ընդհանուր պատմության հետ միասնության մեջ: Այդ միասնությունը կարելի է ապահովել.

1. միևնույն դարաշրջանի պատմական դեպքերի ու երևույթների համաժամանակյա ուսուցման միջոցով,
2. ընդհանուր պատմական հասկացությունների ու գաղափարների յուրացման միջոցով, որոնք կկոնկրետացվեն հայոց պատմության փաստական նյութի վրա,
3. համաշխարհային դեպքերի և իրադարձությունների (համաշխարհային պատերազմներ, մշակույթ և այլն) միացյալ ուսումնասիրման միջոցով,
4. ներառարկայական կապերի մշտական իրականացման միջոցով,
5. ներածական դասերի, ընդհանրացնող և ամփոփիչ կրկնությունների միջոցով<sup>1</sup>:

---

<sup>1</sup> Ղուկասյան Ա., Գյուլբուղաղյան Ա., Հայոց պատմությունը 6-7-րդ դասարաններում, Մեթոդական ձեռնարկ, Երևան, 2007, էջ 5:

Պատմական երկու դասընթացների կապն ու հիմնական գծերի համեմատումը հնարավորություն է ստեղծում ձևավորելու գիտելիքների ամբողջական համակարգ համաշխարհային պատմության վերաբերյալ, պարզելու մարդկության պատմության ճակատագրի ընդհանուր կողմերը և առանձնահատկությունները, որոշելու մեր երկրի տեղն ու դերը համաշխարհային պատմության մեջ, նրա ավանդը մարդկային քաղաքակրթության ստեղծման ու զարգացման գործում:

«Հին Եգիպտոս» թեմայի առնչությամբ նշում ենք, որ Հայկական լեռնաշխարհի հնագույն պետությունները սերտ կապեր են ունեցել Եգիպտոսի հետ: Որպես ասվածի վառ ապացույց կարելի է բերել Կարմիր բլուրում հայտնաբերված եգիպտական Սոխմետ դիցուհու հախճապակյա հիերոգլիֆագիր հմայիլի օրինակը: Դպրոցականներին ասում ենք նաև, որ հայերը Եգիպտոսին առնչվել են մեր թվարկությունից առաջ: Փարավոններից ոմանք խնամիական կապեր են ունեցել հայ թագավորների հետ: Ականավոր պատմաբան Ա. Ալպոյաճյանը իր՝ «Եգիպտոսի նահանգը և հայերը» ուսումնասիրության մեջ գրում է, որ Տուչրատոհին հայոց թագավորի գեղանի դստերը կնության առավ Ամենոֆիս 4-րդ փարավոնը՝ տալով նրան «Մեծ իշխանուհի, իշխանուհի բոլոր կանանց և տիրուհի հարավի և հյուսիսի» տիտղոսը<sup>2</sup>: Այդ իշխանուհին պատմությանը հայտնի է Նեֆերտիտի անունով: Հայտնի են հայազգի շատ իշխանավորներ՝ Ներսես Բասենցին, Վարդան Ալ-Ռումին, Բադրալ Ջամալին, Ներսես Կամսարականը, Հովհաննես և Արտավան Արշակունիները, Բեհրամ Ալ-Արմանին և ուրիշներ, որոնք պետական, զինվորական բարձր պաշտոններ են վարել Եգիպտոսում:

Օրինակ՝ հին աշխարհի պատմության դասընթացի ուսումնասիրության ժամանակ «նախնադար» բաժինը ուսուցանելիս նշում ենք, որ Հայկական բարձրավանդակը նույնպես եղել է մարդկության հնագույն բնօրրաններից մեկը՝ անհիշելի ժամանակներից սկսած, և Հայաստանի շատ վայրերում (Արգնի, Արտին, Նուռնուս, Գյումրի, Վանաձոր, Սանահին, Սևանա լիճ և այլն) հայտնաբերվել են հնագույն բնակավայրեր:

Հին Միջագետքի և Բաբելոնի դասանյութերն ուսուցանելիս՝ պետք է ցույց տալ Հայկական լեռնաշխարհից սնվող Տիգրիս և Եփրատ գետերը: Տիգրիսի վտակներից

<sup>2</sup> Ղևոնդյան Հ., Պատմության դասավանդման մեթոդիկա, Երևան, 2001, էջ 136:



մեկի՝ Ֆարկինի ասին է գտնվել Տիգրանակերտ քաղաքը, հակիրճ պատմել նրա հիմնադրման մասին, ապա ավելացնել, որ Ք.ա. 5-րդ դարում Հայաստանը Եփրատ գետի վրայով առևտրական կապեր է ունեցել Բաբելոնի հետ և արտահանել մեծ քանակությամբ գինի, գյուղատնտեսական ապրանքներ: Հերոդոտը վկայում է. «Այժմ ես կպատմեմ, թե ինչն է իմ կարծիքով, որ ամենից զարմանալին է իրենց քաղաքից հետո սրանց մոտ: Նրանց նավերը, որոնք գետի վրայով գալիս էին Բաբելոն, կլոր էին և բոլորը կաշեպատ: Հայերի երկրում, որոնք ապրում էին ասորեստանցիներից վերև, կտրում էին ուռենիներ, շինում նավի կողերը և պատում կաշվե ծածկոցով, տալով հատակի ձև: Լցնում են ամբողջ նավը ծղոտով, բեռնում են և թողնում, որ իջնի գետնի վար: Մեծ մասամբ նավերով տանում են գինով լիքը արմավենու տակառներ...: Ամեն մի նավում գտնվում էր մեկ էջ, իսկ մեծ նավերում՝ մի քանիսը: Բաբելոն հասնելուց և բեռը ծախելուց հետո նրանք վաճառում են նաև նավի կմախքը և ամբողջ ծղոտը, իսկ կաշին բարձում են էջի վրա և գնում իրենց հայրենի երկիրը»<sup>3</sup>:

Ասորեստանի մասին խոսելիս ուսուցիչը կարող է բերել մի փաստ, որ ուրարտացիները վերցրել են ասորական սեպագիրը, ավելի պարզեցրել են այն և հարմարեցրել են իրենց լեզվին՝ ստեղծելով իրենց սեփական գիրն ու գրականությունը: Արվեստից մեզ հասած նմուշները (շենքեր, տաճարներ, գեղքեր, բրոնզե արձանիկներ և այլն) ցույց են տալիս, որ Ուրարտուն ուներ զարգացման ավելի բարձր մակարդակ՝ Միջագետքի երկրների համեմատությամբ:

Հին Հունաստանի պատմությունն ուսուցանելիս՝ հիմնականում անդրադառնում ենք հայկական և հունական մշակույթի փոխհարաբերություններին, ցույց տալով, որ հունականի ազդեցությամբ հատկապես զարգացել էր թատերական արվեստը: Արտաշատ և Տիգրանակերտ քաղաքներն ունեին իրենց թատրոնները, որտեղ բեմադրվում էին նաև Հունաստանի ողբերգակների երկերը: Հին հունական ճարտարապետության, քանդակագործության մասին խոսելիս՝ տեղեկություններ են տրվում նաև հայկական մոնումենտալ կոթողներից՝ Գառնիի թագավորական բերդի և հեթանոսական տաճարի մասին: Քանդակագործական արվեստից կարելի է հիշատակել Փոքր Հայքի Սատաղ քաղաքից գտնված Անահիտ աստվածուհու կիսանդրու մասին, որն այժմ պահպանվում է Բրիտանական թանգարանում, ինչպես

---

<sup>3</sup>Նույն տեղում, էջ 137:

նան նույն աստվածուհու ոսկեծույլ մարդահասակ արձանի մասին(Ք.ա. 34թ.) որը հափշտակեցին հռոմեացիները Եկեղյաց գավառի Երիզա ավանի տաճարից:

Կարթագենի զորավար Հաննիբալի Իտալիա կատարած արշավանքի առիթով էլ ասվում է, որ նա եղել է Հայաստանում և նրա խորհրդով է Արտաշես թագավորը Ք.ա. 180-160 թվականների ընթացքում կառուցել Արտաշատ քաղաքը, որին հռոմեացիները անվանում էին «Հայաստանի Կարթագեն»: «Ստրուկների ապստամբությունը Սպարտակի առաջնորդությամբ» դասանյութը հաղորդելիս՝ նկարագրվում են ապստամբությունը վայրագությամբ ճնշող բանակի հրամանատար Կրասոսի գործողությունները:

Միջառարկայական կապ ստեղծելով՝ խոսվում է հայերի դաշնակից պարթևների դեմ Կրասոսի արշավանքի (Ք.ա. 53թ.) նրա սպանության և կտրված գլուխը Արտաշատ՝ պարթևների թագավոր Օրոդեսին բերելու մասին, որը եկել էր տոնախմբության՝ թագաժառանգ Բակուրի և Արտավազդի քրոջ ամուսնության կապակցությամբ: Այնժամ արքունի թատրոնում բեմադրվում էր Եվրիպիդեսի «Բաքոսուհիներ» ողբերգությունը, դերասան Յասոնը իրականացնում է Արտավազդի մտահաղացումը, ողբերգության մեջ պահանջվող բուտաֆորային գլխի փոխարեն վերցնում է Կրասոսի գլուխը և բեմ մտնելով արտասանում. «Տուն վերադառնալով, մենք բերում ենք լեռներից նոր սպանված եղջերուն՝ բախտավոր մի որս»<sup>4</sup>:

Հռոմեական նվաճումների մասին դպրոցականներին պատմելիս՝ պետք է հիշեցնել, որ բազմիցս նրանք փորձել են նվաճել Հայաստանը, բայց համառ դիմադրության են հանդիպել, իսկ պարտության դեպքում հայերը չեն ընկճվել, և իբրև օրինակ բերել հետևյալ հատվածը. «Ք.ա. 34թ. Հայաստանի դեմ տարած հաղթանակից հետո հռոմեական զորավար Անտոնիոսը վերադառնալով Եգիպտոս, իր հետ տանում է Արտավազդ Երկրորդին, նրա կնոջը և երկու երեխաներին, որոնց ոսկե շղթաներով անց էին կացնում հաղթական շքերթի առջևից, իսկ Կլեոպատրան նստած էր արծաթապատ բեմում, ոսկե գահի վրա, Անտոնիոսի կողքին: Հռոմեացիները գերեվարվածներին համոզում էին, որ Կլեոպատրայի առջևից անցնելիս նրան անվանեն «թագուհիների թագուհի» և փրկություն աղերսեն: Բայց հայ գերիները մահը գերադասելով աղերսանքով ձեռք բերված ազատությունից, խրոխտ ու

<sup>4</sup> Նույն տեղում, էջ 139:

արհամարհանքով անցնում են գահավորակի մոտով: Այդ մասին հույն պատմագիր Դիոն Կասիոսը գրում է. «Հայերը ցույց տվեցին իրենց ոգու արիությունը, ուստի և փառավոր անվան արժանացան»: Իսկ Վերգիլիոսը «Էնեականի» մեջ գրում է. «Արաքսը չի հանդուրժում կամուրջներ», այսինքն Հայաստանը չի հանդուրժում օտարի լուծը:

Չպետք է մոռանալ միաժամանակ դպրոցականներին ասել, որ հռոմեացիների դեմ արյունահեղ ճակատամարտերում հայերն իրենց շատ անգամ փառքով են պսակել և որպես օրինակ բերել 62թ. Արածանիի ափին՝ Հռանդեայում հռոմեական զորքերի ծանր պարտությունը, որտեղ անպարտելի համարվող հռոմեական լեգեոնները խայտառակվեցին և ծնկաչոք անցան հայերի «լծի» տակով, որը ամենամեծ ստորացումն էր:

## ԳԼՈՒԽ II

### ՄԻՋԱՌԱՐԿԱՅԱԿԱՆ ԿԱՊԵՐԻ ՍՏԵՂԾՄԱՆ

#### ՀՆԱՐԱՎՈՐՈՒԹՅՈՒՆՆԵՐԸ ՊԱՏՄՈՒԹՅԱՆ ԴԱՄԻՆ

##### 2.1. Միջառարկայական կապերի ստեղծումը բանավոր շարադրանքի ընթացքում

Միջառարկայական են կոչվում այն կապերը, որոնք ստեղծվում են տարբեր առարկաների համապատասխան թեմաների կամ ուսումնասիրվող հարցերի միջև:

Պատմության ուսուցչի խնդիրն է ուսուցումն այնպես կազմակերպել, որ բնության և հասարակական կյանքի բոլոր օրենքները, որոնք քննարկվում են տարբեր ուսումնական առարկաների ծրագրերում, դիտվեն միասնության և փոխադարձ կապի մեջ<sup>5</sup>: Այդ առումով էլ միջառարկայական կապերը կարելի է բաժանել մի քանի տեսակների: Դրանք կարող են լինել.

1. Ծրագրարային - ժամանակային, որ նախատեսվում է տարբեր առարկաների ծրագրերում, և որ ուսումնական նյութերն ըստ ժամանակի դասավանդվում են այնպիսի հաջորդականությամբ, որ հնարավոր է լինում մի առարկայից դպրոցականի ստացած գիտելիքներն օգտագործել հարակից առարկաների նոր գաղափարները պարզաբանելու համար:
2. Լրացնող կապեր, որոնք օգտագործում են տվյալ առարկայի հարակից առարկային վերաբերող հարցերը պարզաբանելու համար:
3. Գաղափարական կապ, որով պահանջվում է այս կամ այն առարկայի դասընթացում քննարկվող միևնույն գաղափարը մեկնաբանել միևնույն ձևով՝ արդի գիտական մակարդակին համապատասխան:

Մեր ժամանակներում առաջնակարգ նշանակություն է ստանում առարկաների և գիտությունների համագործակցությունը՝ միջառարկայական կապերը: Ուսուցման գործընթացում կարևոր տեղ պետք է հատկացնել միջառարկայական կապերին, որոնք ուսուցման հաջողության անհրաժեշտ պայմաններից են: Միջառարկայական կապերի մասին Յ.Ա.Կոմենսկին իր «Մեծ դիդակտիկա» աշխատությունում նշում է, որ ուսումնական առարկաների փոխկապակցված ուսուցումը երեխաներին սովորեցնում է բացահայտել ուսումնասիրվող առարկաների և երևույթների միջև

<sup>5</sup> 101 գաղափար նորարարական մեթոդներ կիրառող ուսուցիչների համար, խմբ.՝ Մերենյի Ա., Սաբո Վ., Տակաչ Ա., Բուդապեշտ, 2006, էջ 55:

եղած կապերը. «Ամեն ինչ ամրապնդել բանականության հիմունքներով նշանակում է ամեն ինչ սովորել՝ մատնացույց անելով պատճառները, այսինքն՝ ոչ միայն ցույց տալ, թե ինչպես է այս կամ այն բանը տեղի ունենում, այլ նաև ցույց տալ, թե ինչու դա այլ կերպ լինել չի կարող: Չէ՞ որ իմանալ որևէ բան նշանակում է իրը ճանաչել իր փոխկապակցվածության մեջ»: Նա գրել է, որ բնության մեջ բոլոր առարկաներն ու երևույթները գտնվում են փոխադարձ կապի մեջ, ուստի դրանց վերաբերող տարբեր առարկաների գծով գիտելիքներն էլ պետք է ուսուցանվեն միմյանց լրացնելու միջոցով: Կոմենսկին միջառարկայական կապերը համարել է «Գիտությունների մեծ հարստություններ ձեռք բերելու լավագույն միջոց»:

Որպես գիտելիքների ամբողջություն պատմությունը սերտ կապերի մեջ է այլ գիտությունների՝ հատկապես ընդհանուր մանկավարժության հետ: Այս կապերի շուրջ եղել են տարբեր կարծիքներ և ձևավորվել տարբեր ուղղություններ: Դրանցից առաջինը պայմանականորեն կարելի է անվանել դիդակտիկական ուղղություն /Պ. Լեյբենգրուբ, Ֆ. Կորովկին և ուրիշներ/: Այս տեսակետի կողմնակիցները հակված էին համադիդակտիկական սկզբունքներն ու մեթոդները փոխադրել պատմության դասավանդման բնագավառը՝ չբացահայտելով, կամ անլիարժեք կերպով բացահայտելով պատմության, որպես ուսումնական առարկայի առանձնահատկությունները: Ըստ այդ տեսության՝ պատմության դասավանդման մեթոդիկական վերածվում էր համադիդակտիկական սկզբունքների ու մեթոդների սոսկական շարադրման և համեմված էր լինում միայն պատմության դասընթացից քաղված օրինակներով:

Միջառարկայական կապերին անդրադարձել են նաև Ա. Դիստերվիգը, Կ. Դ. Ուշինսկին, հայ մեծ լուսավորիչ Խ. Աբովյանը և ուրիշներ: Միջառարկայական կապերի օգտագործման գիտական հիմնավորմանն անդրադարձել է նաև Ն. Կ. Կրուպսկայան: Նա իր «Դիդակտիկական մոտեցում առանձին առարկաների ուսումնասիրմանը» և «Մեթոդական գրառումներ» հոդվածներում ցույց է տվել պատմության, հասարակագիտության, մայրենի լեզվի, գրականության, աշխարհագրության և մյուս առարկաների միջև եղած բնական և տրամաբանական կապերը, նրանց առնչությունները: Հայ իրականության մեջ վերջին

տասնամյակներում միջառարկայական կապերի հիմնախնդիրներին անդրադարձել են Մ. Մելքունյանը, Ի. Ղարազյոզյանը և ուրիշներ:

## **2.2. Ինտերակտիվ դասի պլան՝ ԽԻԿ համակարգով**

**Ամիս, ամսաթիվ** - 05.11.2021թ.

**Դպրոց** - .....

**Դասարան** -10-րդ

**Առարկա** - Հայոց պատմություն

**Աշակերտների թիվը** - 20 աշակերտ /12 աղջիկ, 8 տղա/

**Դասի թեմա** - Հայոց թագավորությունները Ք. ա. 331- 201 թվականներին

**Դասի տևողությունը** - 45 րոպե

**Դասի նպատակները՝**

*ա/ Ակադեմիական*

1. Իմանալ՝ ով է Ալեքսանդր Մակեդոնացին, և ինչ ընթացք ունեցավ նրա Արևելյան արշավանքը,
2. Իմանալ, թե ինչու Մակեդոնացին չնվաճեց Հայաստանը,
3. Իմանալ, թե ինչու Մակեդոնացու տերությունը շատ արագ տրոհվեց:<sup>6</sup>

*բ/ Մոցիալական*

1. Ձևավորի ազգային ավանդույթներին հավատարմության, հպարտության և արժանապատվության զգացումներ,
2. Սերմանի պատմական հզոր կերպարների գործերը գնահատելու և որոշ գծերով նրանց նմանվելու ձգտում:

*գ/ Կիրառական*

- Կառուցողական մտածողության ձևավորում

*դ/ Չարգացնող*

- Միջառարկայական կապերի ստեղծում

*ե/ Դաստիարակչական*

---

<sup>6</sup> Ղուկասյան Ա., Գյուլբուդաղյան Ա., Հայոց պատմությունը 6-7-րդ դասարաններում, Մեթոդական ձեռնարկ, Երևան, 2007, էջ 77:

- Գիտակցի իրեն որպես ազգային արժեքների կրողի, պահպանողի, հարստացնողի ու փոխանցողի,
- Արժևորի հայ ժողովրդի պայքարը օտար զավթիչների դեմ մղված պայքարում:  
**Անհրաժեշտ պարագաներ** - դասագիրք, քարտեզ, գրատախտակ, տետր, գրիչներ:  
**Ցուցադրական նյութեր** – նկարներ Ալեքսանդր Մակեդոնացուց:  
**Հիմնական հասկացություններ** – Ալեքսանդր Մակեդոնացի, Իսոս, Գավգամելա, Երվանդ III, Միթրաուստես, Բաբելոն, հելլենիզմ, Սելևկյան տերություն, Շամ, Արշամ, Մամոսատ, Բագարան:  
**Միջառարկայական կապեր**- համաշխարհային պատմություն, գրականություն, աշխարհագրություն, նկարչություն:  
**Դասի տիպը**- Ներածական դասախոսություն, նոր նյութի ուսումնասիրում:

### ***Դասի ընթացքը***

#### **Խթանման փուլ- 10 րոպե**


##### **Քայլ 1.**

Դասը կարելի է սկսել Ալեքսանդր Մակեդոնացու նկարների ցուցադրությամբ: Դրանից հետո ուսուցիչը փորձում է պարզել՝ արդյո՞ք աշակերտները կռահել են, թե որն է դասի թեման: Աշակերտների արձագանքը չի ուշանում: Մինչև թեմայի ուսումնասիրումն ուսուցիչը կարող է ներածական զրույցով և հարցերի միջոցով վերականգնել աշակերտների ունեցած գիտելիքները Ալեքսանդր Մակեդոնացու և նրա արշավանքների մասին, որոնք արդեն ծանոթ են համաշխարհային պատմությունից: *(4 րոպե)*

##### **Քայլ 2.**

Չափազանց օգտակար է համարվում պրիզմայի մեթոդական հնարի կիրառումը: Ուսուցիչը գրատախտակին գրում է *Ալեքսանդր Մակեդոնացի* մեկնաբանը և առաջարկում աշակերտներին հայտնել մեկնաբանի ազդեցությամբ իրենց մտքում ծագած առաջին երկու պատահական բառերը: Դրանք ևս գրանցվում են գրատախտակին, որից հետո շարունակվում է ասոցիատիվ մտածողության վրա հենվող այս աշխատանքը մինչև պրիզմայի փակվելը: Աշխատանքն ավարտելուց հետո պետք է մեկնաբանը միացնել վերջնաբանի հետ, փորձել կապ գտնել նրանց

միջև: Աշակերտները կարող են մտածել, փնտրել, գտնել և ներկայացնել այդ կապն արտացոլող մեկ նախադասություն կամ միտք: (6 թույլե)



**Իմաստի ընկալում- 20թույլե**

**Քայլ 3.**

Պրիզմային հաջորդում է ուսումնական նյութի իմաստի ընկալումը: Դասագրքի տեքստը ըստ ենթավերնագրերի բաժանվում է 5-հոգանոց համագործակցային 2 փոքր խմբերի և առաջարկվում ընթերցել, ընկալել, ըմբռնել դրանց բովանդակությունը: Իսկ մյուս երկու խմբերը կարդում են հատվածներ Պլուտարքոսի «Համեմատական կենսագրություններից» և բանավոր ներկայացնում դասարանին, որպես լրացում: (5 թույլե)

**Խումբ 1-** Կարդա՛լ և սովորե՛լ «Ալեքսանդր Մակեդոնացու արշավանքը և Հայաստանը» ենթավերնագիրը /էջ 73- 75/:

**Խումբ 2-**Կարդա՛լ և սովորե՛լ «Հայկական թագավորությունները և Սելևկյան տերությունը» ենթավերնագիրը / էջ 75- 76/:

**Խումբ 3-** Կարդա՛լ և սովորե՛լ հատվածներ Պլուտարքոսի «Համեմատական կենսագրություններից»:

**Խումբ 4-** Կարդա՛լ և սովորե՛լ հատվածներ Պլուտարքոսի «Համեմատական կենսագրություններից»:



**Քայլ 4.**

Աշակերտները իրենց հանձնարարված ենթվերնագրերը և տրված գրականությունից հատվածները ուսումնասիրում են քառաբաժան հնարի միջոցով: Ուշադրություն դարձնելով հետևյալ հիմնահարցերին /հիմնահարցերը ուսուցչի կողմից նախօրոք մշակված և գրված են գրատախտակին/: (12 թույլե)

1. Ի՞նչ էիք տեսնում տեքստը կարդալիս:
2. Ի՞նչ էիք զգում տեքստը կարդալիս:
3. Կապը իրական կյանքի հետ:
4. Նոր վերնագիր:

Ներկայացված էր Մակեդոնացու դեպի Արևելք կատարած արշավանքներն և մղած ճակատամարտերը:	Մարդկային անսահման հզորություն և նորանոր նվաճումների ձգտում:
Անընդհատ հզորանալու ձգտում և դավաճանության ու շահերի բախման արդյունքում տերության պառակտում:	Մակեդոնացին և Հայաստանը

**Քայլ 5.**

Քառաբաժան հնարի միջոցով ընթերցումն ավարտելուց հետո կազմակերպվում է խմբային քննարկում: (3 թույլե)

**Կշռադաստման փուլ- 8 թույլե**

**Քայլ 6.**

Այնուհետև խմբերը ներկայացնում են իրենց աշխատանքը դասարանին: Տեղի է ունենում համադասարանական քննարկում, հայտնում են տեսակետեր, մոտեցումներ, գրքում առկա նյութերը լրացվում են կարդացած գրականությունից: Ուսուցիչը ուղղորդում է քննարկման ընթացքը, պարզաբանում չհասկացված հատվածները: Այս ձևով խմբերը միմյանց են փոխանցում ընթերցանության ընթացքում իրենց ձեռք բերած գիտելիքները:

## **Գնահատում և անդրադարձ-5 թույլ**

Խմբերը գնահատվում են ըստ՝

- Պատասխանների հիմնավորվածության,
- կարևոր հիմնախնդիրների առանձնացման /գլխավորը երկրորդականից տարանջատելու կարողություն/,
- համագործակցության ընթացքում դրական վարքագծի դրսևորման հատկանիշներով:

Խմբերի բոլոր անդամները գնահատվում են հավասարապես:

## **Տնային առաջադրանք-2 թույլ**

Սովորել դասը պատմել, կարդալ հատվածներ Պլուտարքոսի «Համեմատական կենսագրություններից»: Կազմել ժամանակագրական աղյուսակ:

<b>Իրադարձություն</b>	<b>Թվական</b>
Ալեքսանդր Մակեդոնացի	Ք.ա. 356- 323 թթ.
Գրանիկոսի ճակատամարտ	Ք. ա. 334 թ.
Իսոսի ճակատամարտ	Ք. ա. 333 թ.
Գավգամելայի ճակատամարտ	Ք. ա. 331 թ.

## ԵԶՐԱԿԱՑՈՒԹՅՈՒՆ

Այսպիսով, վերը շարադրվածի հիման վրա կարելի է եզրակացնել, որ՝

1. Միջառարկայական կապերի իրագործումը նպաստում է գիտելիքների խոր և բազմակողմանի յուրացմանը, գիտական հասկացությունների և օրենքների ձևավորմանը, ուսումնադաստիարակչական գործընթացի կատարելագործմանը և նրա օպտիմալ կազմակերպմանը, գիտական աշխարհայացքի ձևավորմանը, նյութական աշխարհի ընդհանրացմանը, բնության և հասարակության մեջ երևույթները փոխկապվածության մեջ ընկալելուն: Բացի այդ, դրանք նպաստում են սովորողների գիտելիքների գիտական մակարդակի բարձրացմանը, զարգացնում են տրամաբանական մտածողությունն և ստեղծագործական ունակությունները: Միջառարկայական կապերի իրագործումը հնարավորություն է ստեղծում խնայելու ժամանակը, սովորողների ընդհանուր ուսումնական կարողությունների և հմտությունների ձևավորման համար ստեղծելու նպաստավոր պայմաններ:

2. Պատմության ուսուցչի խնդիրն է ուսուցումն այնպես կազմակերպել, որ բնության և հասարակական կյանքի բոլոր օրենքները, որոնք քննարկվում են տարբեր ուսումնական առարկաների ծրագրերում, դիտվեն միասնության և փոխադարձ կապի մեջ:

3. Միջառարկայան կապերի շնորհիվ առավել մատչելի ու դյուրին է դառնում նոր նյութը ինչպես բնագիտական, այնպես էլ հումանիտար առարկաների ուսուցման դեպքում: Զարգացնում է սովորողի մի շարք կարողություններ, հատկապես մտածելու և տրամաբանելու տարատեսակ կարողությունները:

4. Միջառարկայական կապերի մեծ հնարավորություններ կան ինչպես հայոց պատմության, այնպես էլ ընդհանուր պատմության դասընթացների ուսումնասիրման ժամանակ: Ուսուցչի խնդիրն է կատարել համապատասխան ընտրություն: Հայ ժողովուրդն իր անցյալով առնչվել է աշխարհի հնագույն և ներկա շատ ժողովուրդների հետ, սակայն պատմության դասընթացները ի վիճակի չեն ըստ ամենայնի արտացոլել դրանք, և այդ աշխատանքը թողնված է ուսուցչին, որը նա պետք է իրականացնի միջառարկայական կապերի միջոցով, խնամքով,

բարեխղճորեն ընտրի փաստերն և օգտագործի դասավանդման ընթացքում՝ որպես լրացուցիչ նյութեր:

5. Մանկավարժական պրակտիկայում երբեմն նույնացնում են միջառարկայական կապերն և ինտեգրացված դասերը: Այժմ էլ ինչպես բարձր դասարաններում, այնպես էլ արտադասարանական առարկայական խմբակների պարապմունքներում, կազմակերպվում են ինտեգրացված դասեր՝ նվիրված կոնկրետ որևէ տարողունակ համալիր ընտրովի թեմայի ուսումնասիրմանը:

Այսպիսով, ուսուցումն արվեստ է, իսկ ուսուցման վարպետությունը՝ անհրաժեշտություն:

## ՕԳՏԱԳՈՐԾՎԱԾ ԳՐԱԿԱՆՈՒԹՅԱՆ ՑԱՆԿ

1. Ղուկասյան Ա., Գյուլբուդադյան Ա., Հայոց պատմությունը 6-7-րդ դասարաններում, Մեթոդական ձեռնարկ, Երևան, 2007, 88 էջ:
2. Ղևոնդյան Հ., Պատմության դասավանդման մեթոդիկա, Երևան, 2001, 263 էջ:
3. Մելքոնյան Ա., Ավետիսյան Հ., Մովսիսյան Ա., Հովհաննիսյան Պ., Դանիելյան Է., Հայոց պատմություն (հումանիտար հոսք), 10-րդ դաս., Երևան, 2014, 255 էջ:
4. Մերենյի Ա., Սաբո Վ., Տակաչ Ա., 101 գաղափար նորարարական մեթոդներ կիրառող ուսուցիչների համար, Բուդապեշտ, 2006, 63 էջ:
5. Պապոյան Հ., Պատմության դասավանդման մեթոդիկան դպրոցում, Երևան, 2013, 298 էջ:
6. Քոսյան Ա., Գրեկյան Ե., Հարությունյան Գ., Համաշխարհային պատմություն (հումանիտար հոսք), 10-րդ դաս., Երևան, 2009, 223 էջ:
7. Հանրակրթական հիմնական դպրոցի «Հայոց պատմություն» առարկայի չափորոշիչ եվ ծրագիր (6-9-րդ դասարաններ), ՀՀ կրթության և գիտության նախարարություն, Երևան, 2012, 80 էջ:

### Համացանցային պաշարներ

1. Ուսուցման մեթոդներ - <https://www.slideshare.net/torosian/ss-9876301>- (հասանելի է 11.08.2022թ.)
2. Ուսուցման մեթոդներ - <http://documents.tips/documents/5565b367d8b42a48268b45f1.html>- (հասանելի է 06.08.2022թ.)